

青

郊

詩

存

青郊詩存卷之一

湘潭梁棟壘

戰渤海

海艦夜突聲嗚嗚
洪濤激蕩風力癡
狂挈怪吼大海裂
片鐵鳴空飛赤血
千尸伏船臥澎湃
一將麾軍奮忠烈
謂鄧公 須臾龍匿雷霆收
旌旗摧蕩寒中流
君不見腥世昌
波怒齧劉公島
至今潛窟蛟鼉老

渝關行

朔風河流冰虜騎
寒不驕將軍策敵
不得渡夜唱漢代

從軍謠俄聞平壤失未幾渝關搖在軍有馬服命將皆
嫖姚敵弩雖強豈命中坐待奏捷明堂朝座上白玉符
腰間金錯刀敵兵壓危城愛弄手自操軍士扶奔日百
里猶言漢兵且勿逃形勢善守法不敗自有天家雙節
旄

西市哀

昔有三良悲今爲六士哀西風搖紫極白日忽昏隕匿
者晦煙霧奔者驅風雷危機不可履良友貽之災世道
惜善類文章憫高材白壁碎爲屑芳蘭燼爲灰當時志

慷慨行路心顏摧

燕歌行

燕郊豪客心激烈
燕市游人意淒切
報讐斷脰假國恥
千家百家爲誰死
淚如雨下汗流水
君王和會朝外臣
白晝磨刀橫殺人
海水屹立驅鬼神
虎豹夜蹙燕郊塵
嗚呼荆軻漸離古
無有里中無賴爭
徒手國破爲俘繫
之走

長安行宮歌

漢宮唐苑連馳道
寥落千年沒秋草
故壘鶻啼有血斑

青郊詩存

卷一

三

遺陵鶴唳空華表處處寒雲粉堵斜九衢無復故侯家
惟餘皎潔長安月猶照離披帝子花月自清秋花自春
燕山鐵騎起煙塵早聞毒氣乘華蓋旋見妖星照紫宸
龍衣黯黯秋風惡八駿無聲向西躍太行山下集王師
華清池畔迎天樂秦中父老治壺漿秦中官吏修臺閣
壺漿絡繹出東城臺閣崢嶸擬舊京神廟初題樞密省
民家多宿羽林兵行宮金壁遙相望兩聖垂旒日南嚮
猛士徘徊鳩鵲樓中官趨走芙蓉帳帳下樓前會百僚
此時雲日儼青霄問安幣帛修秋貢入衛熊羆護早朝

四方朝貢多徵調東盡江淮南海嶠合沓輪蹶贊轉輸
迴旋鱗翼看騰蹕御膳三巡進玉盤詔書百道走金鞍
繁華轉瞬成都會多少愚氓覩聖顏清渭旋龍扶日月
終南矯鳳承宮闕百代英風社土墟一朝佳氣鑾輿出
鑾輿震蕩九門開豈料滄波定劫灰空壁幸聞胡馬去
清塵先遣屬車回茲行不爲秋游豫烽火纔消除輦路
仙仗朝移捲殿雲牙旗夜盪霑山露忽然光嶽易方隅
頓使寒溫殊旦暮寂寞鵝行復幾年高梧疏柳赤墀前
不傳玉漏閒清晝但鎖椒垣聚野煙論都自昔聞劉敬

豈備時巡屯萬乘扈蹕何人解獻書賜酺幾日紛傳令
祇今三輔聽謳歌何須盛典誇前聖

遼陽篇

喬柯鵲所爭叢皋雉所保羣鳥苟見陵奮死鬪以爪豈
不愛筋力所懼喪其寶誰能疆域中他人肆征討西鄰
勿我責東鄰爾毋躁中立爾友邦用此交鄰道主退共
爲客立言固云巧堅冰夙所戒履霜苦不早入門無人
門豈曰堂室好

朝議府君遺畫歌

先曾祖諱寶善字子明
寄籍桂林封朝議大夫

青春胡爲留百年千花萬花東風顛芬芳節操舉不滅
何必口耳相流傳先人肥遯古有道不恥無官恥得錢
傳家經籠燼喪亂幸保數尺桃花箋憶從桂林初避地
種秫誅茅洞壑前羣季諸郎盡簪紱獨秀自汲寒流泉
築室獨秀峯下弟寶書官直隸遵化直隸州知州
姪承光官山西永寧州知州皆來迎以道遠不往岸幘
揮觴謝賓侶醉拂絹素生古妍豪家羨取不可致遮置
壺榼來周旋有時酒罷輒棄去片紙珍貴逾璆鳴呼
垂老被兵革杖策夜度蒼梧煙咸豐辛亥歲金田發難
桂林被圍臨川黃公金
門署永明縣事以兒女姻親迎府君來湘琴書飄蕩供遠適洞庭野水搖秋

天頽顏傲兀少述作偶醉縱筆稱酒仙雨湖之圖號六

老時府君寓雨湖之雨花別業與先叔曾祖竹君公及

連湘潭曹君石倉馮君此山荆州聶君左村僧遠裔流

爲六老圖刻石於壁憑石灑翰神邈然藏楹往者二

縹軸六丁取一龍火燃舊藏別有屏軸光緒甲午茲圖

不壞歷數劫善自韜晦珠隱淵葩繁柯復森挺接世間

俗手空嬋媽風流不類徐青藤標置無假憚南田蛟蚪

騰踔鸞鳳騫珊瑚碧玉顏色鮮瑤臺眾仙下聚會明堂

萬國爭班聯瑰名麗號不悉舉但與氣序爲後先湘綺

標題取春信光緒壬寅春王湘綺詞丈雲芝霜柏冬夏堅

題幀首春信圖三字

可知爛漫發幽想品第羣芳嬉大千伊誰骨格鬪蒼古
朱奄李鯁推兩賢高風繾綣詔孫子千歲枝葉紛鈎連
後來再拜奉手澤自述祖德慚往篇

述哀詩

先祖諱承憲字柳村以知縣官浙江
咸豐十一年冬杭州陷閣門遇難

兩浙財富蔽衛禦疏戍屯窮寇善擣虛列郡撤屏藩心
膺旣孤懸併力窺杭垣倉皇十萬眾乘勢如燎原戰守
苦無策主帥喪其元咸豐辛酉十一月汪海洋
陷杭州巡撫王有齡死之豪華名
都宅烈火一夕燔城守皆被徒匍匐出無門婦人迫以
刃丁男隸其羣殺氣纏陰風萬竅騰厖喧先祖時作宦

論事趨大轅計畫安所施飛書急求援客兵遠莫及引

領安越軍

李公元度領安越軍屯江山縣

惻惻問家室憂煎中自焚大

母繼來嬪

繼祖母鄒宜人仁

竭蹶供饗殮適茲非常變

清淚流露巾默知大摧裂諒無良平勳君欲就大義妾

意良亦欣引決在斯須僮奴皆驚奔牀前兩嬰兒樓抱

兜長裙大兒纔數歲徒泣俱無言就母執母手豈知母

心煩黃沙蔽天色頽陽忽西翻繁音叫愁烏激響啼哀

猿池清井水冽側耳聲潺湲長者分當死幼者寧獨存

舉家赴泉壤天命復誰論沈沈錢塘月慘慘孤山雲四

序非春秋百年無朝昏咄咄徒爾爲悠悠何紛紛其時

朝議公避難湘水源擔囊止長沙狼狽攜先君

先曾祖朝議府

君先由桂林攜先大夫避亂遷長沙十載梗消息吉凶無傳聞朝議倏見

背先曾祖以同治丁卯歲棄養江湖斂妖氛先君失父耗三往求之

殷同治戊辰巳庚午間事號泣行通衢嗟哉零丁文玄髮化爲皤

素衣污成纁最後得葉某大母姻弟昆始知辛酉冬變

故毀乾坤且言昔與亂倖脫餘生云大化倏歸盡未卒

親戚恩驚風絕中腸愴慟聲莫吞徬徨尋寓舍寂寞見

秋園野草悵猶綠暮雨悽以繁荒塵灑瓜蔓壞瓦覆松

根往日屋主翁無復子若孫白骨誰見收禍亂事紛紜
鄰人非夙昔諮詢空數番當時向冥漠存想羅幽魂楚
歌東南歸湘波滋啼痕招魂珮與黻茅岡餘孤墳浙江
陷千里數歲隔煙塵官吏一朝盡事狀傳失真平生慄
慨意至此寧逡巡骨月生亂離求死匪無因同時委灰
燼轉得精魂親玉碎豈足惜况與豺虎鄰倉卒不可爲
反袂在茲辰吾宗旣孤弱天屬無多人茲役喪三四酷
罰彌酸辛先澤幸未斬一髮懸千鈞小子述所哀豈曰
悲湮淪

東遊放歌

西槎不泛大西洋東航始涉日本海傳聞徐福引船去
方丈蓬萊至今在飢食富士山中雪渴飲箱根山下泉
何須苦求不死藥持此差可參神仙我來去君五千年
秦皇漢武皆茫然乃今學仙不似昔員冠方領何聯翩
嗚呼百川善學水善下誰歟能自得師者眼中偃蹇非
昔遊花草冥冥古唐社從來師我今我師物新人舊猶
華夏星火推移反掌間滄波東逝海西翻林颺爛作丹
黃色盡洗春朝桃李顏崑墟之鶴不可驂青鳥翩翩時

往還咫尺靈駕翔雲端嗚呼玉堂王母在何處迢遞槐
江是歸路夸父已至虞淵邊精衛初銜微石去日可逐
兮海可填千載此心終一遇誰言變化屈伸由氣數驅
石猶聞到海東褰裳日暮生長風會當揭取靈旗還禹
域矯矯雲中三十六道蒼精龍

紀遊詩五首

南颺飄征裾窅靄天界遠含情辭異國行役未言返啟
塗上新橋驅車遵大阪村樹自奔赴山煙盡飛散川陸
邈迥互登尋彌繾綣高舸駕溟渤安若平土踐迥路顧

盼中御風豈足善斷島文鯉浮永岸修龍偃玉色立波
濤蒼鳥時隱顯朝鮮伏青霧山川迸淒泣北望嗟時危
豈伊客懷淺傑哉威旅防觚觫壞門鍵雖曰守在德履
險胡自免謀國有雄算反手務征殄頗聞奮鯨鬣餘沫
漸流展東隅悼淪失寧咎桑榆晚憶昔泛黃海洲渚濯
烽燹敵船止中流搜擒懼紛舛從容僅得脫臥起足屢
跣芝朶在吾目山勢今偃蹇清瑤比目魚釘盤薦芳腴
念此忘飢渴窗暉對晴緬沈沈碧海搖渺渺孤雲卷迴
輪挾澎湃中腸共千轉邂逅友邦人談飲縱酣健征途

固悠曠俄延駐遐眄葦杭理亦濟蕭然下舸艚宵浪入
塘沽深坐顏不辨十里靜蕪皋侵曉肆游行邇來析木
津剗塹走車輦都人久坦蕩惕若被誅翦帝京忽已睹
欣戚暫得遣

帝京何岌岌缺城邁車鞅疾馳不及瞬星漢靈颺上驚
沙覆頽檐舊潦穿壞壤都會風雨交千齡茲決漭我來
鬱孤念匪直恣瞻仰憶從甲午來三遊與元賞中閒遘
慘劫今昔判若兩舉步躡前蹤晨夕心怏怏樓觀有新
構第宅餘堙敞峩峩古明光胡雛頗來往至今長門間

猶遺舊氈毼鐘簾幸未移園陵庶精爽巷曲寒夜月白
骨在塵埃蕭條蘆葦黃南窪鬼聲響昨者回鑿初意在
收蓋讜延英發徵車下詔勞宏獎拙生昧時務陳論謬
驅強甲篇述三代里閭謀教養乙篇援列邦制幣資國
帑日入筆札窮言侈意不廣廟旨務虛納謂足參廷掌
郊圻覲仁壽旭日排銀榜須臾拜恩澤引手辭仙仗艱
危復何補汗出神悵惘大厦當傾頽支撐豈尋丈誰實
隆棟姿羣材信推蕩挾策恥干請歸與樂間放沈冥苟
自適世變睠吾黨比鄰有好鳥憔悴近羅網離離乘風

飛秋色送清朗高翼何可羈回顧失煙莽披豁違中抱
揮涕眷疇曩徒設入世心焉知物消長去去當何言馳
驅理幽想

清秋動微寒逍遙復東逝黃浦落孤帆暄景正鬢麗故
人一雁至貽我篋中幣先路靡游移追循向靈界良儔
揖車下推款交欣慨旁皇文明域膏馥足沾漑考覽非
一塗往往蒙優惠側聞救阡危首在開國會傾聽錯者
髦所採兩院制載瞻高廣場駢羅見次第棘木訟廷下
科條祛障蔽囹圄構精寮工作等懲戒鈴鞬市野徧警

備弭災癘刀鋸間鍼砭殊妙起死廢穀醴腐人腸物物
任調劑觀象候氛稔慘澹靈憲製傳聲牽眾器口耳無
停滯精者根道妙麤者切生計恢廓若國政瑣雜若工
藝精神所接觸浩渺失涯際稍得就通人遊詢得微契
學校列如林貫串存統系更僕不能終萬事並關繫童
孺各講肆昕宵共勉勵園橋竭心目百益無一弊道旁
車馬前書策手輿隸精嚴萬營壘霜稜威域外丁壯樂
徵送將校饒智慧步騎及輜重所至肅兵隊矇矓樓櫓
接奔騰瞭纖細洪濤服屯聚蔽海散精銳茲行意有嚮

採礦說形勢龜穴三池暮陟岡生野霽璀璨日光山古
河繇年歲器車豈有符寶藏自狼戾元象發幽珍倏歛
雄一世人事有巧拙天道無隆替稱美余何心儲懷夙
游憩執柯況不遠鑑此庶匡濟

歸臥湘春廬振衣忽不悅言尋空靈岸蒼翠巖石滑迴
舟下城陵君山望明滅長飈送湖水征纜凌晨發妻子
遊我俱辭家忘離別江漢鴻雁哀修渚漸風雪虎邱朔
雲裏吳江互蕭瑟回念東海隅淹留抱寒日秣陵夙所
戀十載寄家室提攜終一往似若還蓬篚故舊守門巷

歌呼聲未歇服官固有常朝起事參謁諧嘲匪吾意雜
坐心兀兀偶從見大官亦復少眞率通名罕見答十日
羞不出軍火違材用東郊應書札樓館塵囂外水竹鳴
清越弱湍鱗鯉馳樹葉叢蟬咽雜花垂爛熳危橋幸平
濶以此悅病顏意得安褊拙糾紛公家事可謝當復絕
參差後湖蓮楊柳亦可折謝公留古墩疏溜石罅冽北
山草堂下靈谷雲出沒玉殿掃頽基巍陵俯殘碣落日
清涼山荒城望中列間僧識我久樓檻語親切古來談
兵地層岡祠名傑故宮衰草長雙闕亦崩裂御溝帶清

流霜下湔碧血城邊舊閣子
婉孌湖波活雨花更南眺
幽泉寫芳潔依依桃葉舟
窈窕東關月簫管夜浮沈歡
來甚飢渴良遊慰悽懷興至盡可述
苟能持百年甘與
漁樵暱抱疴意不遂舍去焉可說
終還就海濱臨發增
切怛

目斷雁南歸冉冉伯勞去
江亭晚棲息曲肱屢朝暮棹
隨淞靄移廣塵頓裝處
盧扁世無人島客倘一遇
誰云
一刀圭使我顏色駐
間日就推察鍼下液深注
賓侶侈
園遊鈿車雜馳驚清箏動名謳
羅裳矯冰霧廚中無宿

膳市盡有嘉樹俗濁久亦安獨來成小住寧忘體中苦
涉節經霜露彼都有良醫聞是古俞跗神力苟不虛何
惜輕航渡吾駕竟三發冥心果奚慮殊方樂爲客禪袷
尚平素裴裒席地坐奧曲榻可據蔬肉供常餐未能改
吾故飯罷厭跼躒襪足簷下步同川女時至出浴常倉
遽我且倦呻吟蹇脫人當恕引頂每突壁定痛自箕踞
朱碧咫尺間看之總迷誤佳弟賢友生動輒慶相助求
醫限初暑登車天未曙頗黎貯冷漿呷飲日數度仰臥
聽以筩反覆理若悟乙丙星氣徂未覺稍蠲除匪云術

終疏或今遂沈痼觀濤病良已獨此得其趣縱浪爲將
養遇物求歡豫彭殤共憑化身世吾無與有時喜勿藥
妙在屏憂懼蹤履出高衢忽然得山路竹屋與肩齊翁
嫗衣破絮食我山中梨予值殊不顧勸言返舊居毋爲
俗中務賢達撫深懷茲焉託良晤

東京贈同遊留學諸君

羽籥秋冬雖不傳日程吾黨亦分年名邦別有考工記
橫舍多留勸學篇廢疾膏肓自茲去椎輪大輅果誰賢
要令紫氣歸函谷道德從今寫五千

玉簾瀧

朝漱飛泉暮枕流高尋瀑布散幽憂九霄玉女衣裳薄
萬壑清秋霜霰浮孤嘯脫空寒鳥雀水光隨勢活蛟虯
仰懸天界收諸島拄笏看雲快此遊

夜出觀劇

馳道無塵清漏長良遊勝友不尋常寒燈照地輕車遠

微雨飄衣短鬢涼明治座

日本劇場名

中春瑟瑟二重橋

在東

京御溝上上夜蒼蒼人間賀老琵琶舊卻憶江南淚幾行

望中

黃壘紫茵作朝餐短檠疏葵帶雨看萬族蛟魚齊跳擲
九衢簫鼓競悲歡西樓高壓峯巒秀怪石秋添笠屐寒
今日仙郎尋舊躅往時朝士有悽顏

書所見

蒼黃兵氣竟何如勺籥童年計未疏舉國皆成虎牙將
無人不習解行書海王圖畫充園冊健婦戈矛笑錦車
文武道消吾有園絃歌鼙鼓渺愁予

植物園

青葱玉樹鬱千重輦草濃花海外逢遣興似宜多種秫

長年何故不栽松誰言枯幹無生趣畢竟肥蕘有俗容
自握故園蘭一萼不愁雲裏失芙蓉

感賦

文物先朝且勿論懷中碧血爲誰存銅駝挾恨書生淚
金椀沈哀帝子魂滿地悲風胡虜騎幾年衰草漢宮門
何如東道青鸞翼時帶銀潮玉露痕

勸業會

百產菁英造化工欲持瓊貨映西東寒珠自墮涓涓雨
紫電常吹嫋嫋風冠帔百靈隨窈窕樓臺七寶鬪青紅

十洲三島何人記都在魚龍曼衍中

與人談調查人類館事戲述

意頗譏嘲事有因外交誰肯道其真高原蒙古俱同種
舊域臺灣忽比鄰團髻織鞵終礙眼酒筍茗椀爲傷神
東洋車子閒評在誰識巴黎挾瑟人

贈楊君哲子

三拂緇塵手重分海天漠漠看蒼雲靈均愛國楚江淚
司馬憂時漢室文大澤龍蛇寧溷汝故山猿鶴最憐君
南箕北斗虛名在磐石千秋信可云

贈周君印昆

眼底扶桑落海隅，湘皋晴靄入平蕪。
低回天側閒雲出，太息霜前碧葉枯。
絕世芬芳看島嶼，彌天蒼翠隱江湖。
潮來近夜寒聲急，靜抱秋心與月孤。

送楊君重子歸國

我弟君兄共異鄉，看君高雁獨南翔。
扁舟舊有尋山約，仙府今無煮石方。
亂世離情輕海浪，華年孤興薄文章。
楚天無限青青樹，歸抱清樽慰夕陽。

病中示四弟

危樓孤坐澹無塵鬱鬱悠悠寄此身久病漸傷朋舊少
遠遊彌覺弟兄親不堪世變容孱廢苦憶青山學隱淪
忘是天涯看骨肉殘樽清話兩羈人

贈范君靜生

嶽雲燕樹惜分攜海外高秋共酒卮萬里羈心彌眷眷
十年愁鬢欲絲絲江河一望迴青眼魚鳥無情入夢思
莫苦清塵同浩劫胡僧揮手話多時

楊君哲子往觀日皇巡閱海軍夜過寓樓有贈

啼罷征烏點血痕強扶殘病意昏昏高樓我與秋分榻

題癸卯上野公園餞別圖

不忍池邊樹婆娑上野青酒樽猶昨日舊夢落孤亭欄
檻通幽翠衣衫照窈冥夙心與今古莫忘眼清醒

勝遊良不易高會況仙都感與來時切情寧別後殊酸
寒牛渚白花散馬蹏孤志事飄零甚閒儔過一呼

喜吳雁舟太守見過

憔悴黔南吏馳驅鬢有霜談詩渾已老學佛欲俱忘去
去求三島依依入大荒還知遠來意卻看海頭桑

臥病久沈塞喜君能見過不談家國事須是說維摩得

趣杯中物無情海上波自憐消瘦極爾後欲如何
地震

地中激雷電傾耳聲勢喧振振四壁碎搖搖一燈昏登
樓脫虛步據榻灑離魂駭極轉愁絕徒疑屋瓦翻

風琴

不爲枯桐惜無絃得此琴泠泠送虛籟夜夜侶孤吟似
假風霆力終成鸞鶴音鍾期倘今日應訝伯牙心

送周季良歸國

風軸霆樞自轉旋文章灰死仗誰然須知大海羣流合

要使千鈞一縷延懷抱煙塵堪掃蕩夢魂家國與纏綿
荷衣蘭佩勞歸櫂回首瀟湘漲碧天

浴箱根溫泉

故國華清望不極東遊箱根意未闌泉石琤琮共千古
樓閣照耀非人間豈有桃源堪避亂不須蓬嶠與還丹
惟將一掬池邊水盡洗中原滿目瘡

題櫻花

嶺頭初日水邊霞盡散明珠絡絳紗仙種不傳他國土
嘉名如睹上闌花偶尋別館穿芳徑纔下漁舟過酒家

言方言才 卷一
獨惜殘紅秋不實蟠桃猶羨海西涯

靖國神社

十丈朱旗旭日懸暮鴉秋雨噪祠前遼陽鼓角風翻雪
旅順戈船浪拍天萬井孤嫠朝伏道百年牲璧夜登筵
新詩怕唱屍山積上將新橋哭凱旋

奧大將凱旋詩云
一將功成屍作山

寄贈陳伯嚴考功

江南江北道何之長憶江樓把釀時蔽日浮雲多慘澹
在山泉水獨漣漪誤中莫顧周郎曲劫後誰拈國手碁
獨立不愁人易老春來花鳥草堂詩

贈熊秉三庶常

故山蓬鬢十年來，大地飈輪幾日回。
欲得驪珠探碧海，爲求駿骨上金臺。
荒寒北道看禾黍，辛苦東陲闢草萊。
此別多君富游涉，神州今有濟川才。

送周六兄回國

旅居衰廢益相親，轉瞬尊前少故人。
此別衣裳供涕淚，獨遊鬚髮聽風塵。
殊方更作重來約，歸客翻憐臥病身。
莫漫題書寄消息，故鄉何處不傷神。

時湘水泛漲爲災

堤上作

芳洲斜日照蜻蜓弱柳長松一色青已識胡麻堪作飯
旋看腐草欲爲螢箏瑟隱隱神絃噪刀劍紛紛戰血腥
莫笑居人結茅屋雲中雞犬自冥冥

偶成

癡龍醉臥神狐醒一自沈迷一自驕濁浪千堆昏白日
金光百道弄青霄沈淵信識求珠苦出匣寧望拔劍饒
十二萬年遊戲頃未遑啼血看風潮

日本

歌舞半傳唐樂府衣裳猶用漢官儀儒家組綬崇尼父

佛子旃檀奉辟支銀匣橫腰刀委婉寶釵盤頂髻崔巍
當階解履升蒲席想見先民洗爵時

留別東京諸君

四載浪遊三去國一身殘病暫還家葡萄憶遠頻沽酒
芍藥傷離又著花入世免教蠶作繭求仙空羨棗如瓜
六鰲垂釣慚公等鸞海歸帆有鬢華

入吳淞口

客心永歸途融風促征櫂中流倦遐矚故岸入幽眺吳
淞十里近林煙展迎導晴日晚更妍波濤靜噓嘯移舵

指西景瞥焉得江照飛樓在雲霧汎空吼悲竅蕩漾澄
遠碧託心忘險躁我懷縱歸休潛通猶永好世聲納寤
聽眾籟生啼笑遺情若曠澈應物孰機妙悠悠東海濱
天民有高操

泛長江湖舟還長沙作

遊雲盡西邁孤鳥與俱飛瀟湘何遠近飄然今來歸迴
渚揚朝暎素波明夕暉夙游紛吾心久涉事多違幽蘭
徒爾馥眾卉相與肥覽世累歛歛情戀誰能揮積疴無
由蠲故舊彌依依去住江湖間汗涕常沾衣樓船亦安

步何如守荆扉憂來謝羈役姑還吟采薇

還家

舟行翻車輪道路安所難諸弟就迎我歡然覲河干久
病遠遊歸喜若戰地還家人更相慶當飢遂忘餐童稚
頻過呼雜聒須臾間僅爾三年別離情良已殫

婢有夫行

踉蹌貧家翁入市市鹽米市去不持錢云有八齡女八
齡作童養姑黃母家李夫在郡城南獨去湘潭市匪翁
輕棄女翁言貧欲死作婢亦有命汝但相從此朝朝望

郡城郡城隔秋水不見郡城人淚落清且泚一朝至郡
城暗暗心歡喜主人轉貨我貨我郡城裏柳枝牽作絲
柳花飄作絮絲牽長相繫絮飄何能住昨夜聞主人言
當嫁我去我身不自由我心自有主誰知婢有夫欲言
不敢語柳絲不忍離柳絮不忍墜別君八九年夜夜濺
珠淚少小牽衣裳門前烏柏樹有客山中來似言識其
處爲我問我家倘來一相晤相晤勿遲遲遲恐長乖誤
九載無人顏輾轉居爨下爨下豈可居安得相憐者今
日見家人胸臆不得吐但道婢有夫告言主母所主母

言唯然令汝夫來取禪衫與練裙遺汝盈筐篋副以清
絲繩纖纖雜麻臬別君頭始了見君髮作髻不分得見
君忽焉心膽悸湘山何巍巍湘流何瀾瀾百年恩有極
一旦情無已我生自茲始誰欺實生我主母者梁氏

雜詩

節候轉朱明百物顏色好經時無幾何涼露悽野草人
生盛年時蹙蹙謀溫飽倏忽寒暑徂歡樂苦不早賓朋
半云謝未化亦已老自顧體質弱形容向枯槁將此勝
氣運固知莫能保如何持百年修名庶爲寶

風雨送夕陽暑居亦悠然心目何所有庭樹烏雀喧客
至視我笑我亦無一言美酒聊復傾且醉各盡歡明日
不可知何爲論他年

人言遠遊樂我獨坐一室豈曰好尚殊迫病不得出端
居亦多趣何必輕離別琴書在我前足以送日月況當
結茅茨甘與纓組絕荷鋤耕園桑吾謀諒非拙當風搖
春花經霜綴秋實安得同心人相從醉蓬簞

青郊詩存卷之一

女士梁若愚校字

青郊詩存卷之二

湘潭梁煥奎著

擬西北有高樓

西北有高樓崔巍對蓬萊扶搖不可極白日爲徘徊見者皆動容聞者自開懷上有金與絲音聲何妙哉自非同心友焉知此曲佳激響且勿奏奏之使心哀

擬門有萬里客

門有萬里客至自海西頭語言無絲通相見各有憂本圖出肺腑傾寫不自由執手告珍重厚意如可酬何時

爲佳期良友共綢繆

擬日出東南隅行

若木登天庭輝光照城闈丹樓居妙姬攬袂驕四鄰金
珠約皓腕飄搖散芳塵哀奏斷人腸激舞蕩心神怨婦
坐西閨流盼膺怒嗔嚴光不可逼誰能回歷嘖豐容奪
朝霞嬌態欺麗春冶遊未足厭粧服鬪鮮新亭亭眇漢
皋冉冉眷洛濱歎息城南子虛佇傷美人

今從軍行

昔苦戍遠方今乃衛家門昔迫君臣分今者父子恩情

義苟敦迫寧以爵祿論
讎仇切肌膚恥得性命存
存亡吾一身勞苦安足云
報國非他人壯哉今從軍

今別離

朝發夏口津暮宿交河側
問君何能然離離有羽翼
輕風相與飛欲食不遑息
晨興展君書知君昨夕至
君書不親題空中數行字
妾今書報君逮暮達君地
風塵污征衣恐君顏色改
何時一尺素髣髴見丰采
君倘憶妾容妾容鏡中在

今怨詩

澄澄勃蘭地馥馥淡巴菰素羃下層樓鮮膾行中厨雜
坐何歎息所思北海隅良人有書報探險赴長途裹糧
無歸期行遊復誰娛

春花泣露條鳴鳥厲霜翮坐地暗流淚峨髻慘無澤決
鬪須臾期君行意彌激昔者赴國難幸未罹鋒鏑咄咄
當何求悲風起將夕

彈丸如貫珠匕首不盈握閨中那得睹念此撼心曲寒
雞曉不號耿耿窗已旭未暇施羅裳無心理膏沐丈夫
雖敢死兒女傷局促

九月三日同周君印昆唐君明皆張君潤龍遊麓山憇
白鶴泉歎逝傷離悽然有作

舊日清歌不再聞
屐痕幫影認難分
山泉寂寂幽花澀
巖樹蒼蒼落日曛
宿草數叢隨故土
征鴻幾點入青雲
心魂到此都飄蕩
送酒移船且一羣

廖十丈

樹蘅

贈蔬筍佐以新詩依韻謝之並索後惠

城居不省齏鹽味
臥病強令齏作湯
筐榼累承遺野菜
腥膻何用雜枯腸
新詩爽似哀梨剖
厚意甘如諫果嘗
休道活人資藥餌
仗君頻送筍厨香

廖十丈答前詩復以蔬筍見惠賦此奉酬

少年亦自甘梁肉饗鼎何曾一嚮嘗不分霜巢餘粟粒
祇期春椀滌冰漿瓜媵芋壤田居美筍片芹菹晚膳香
多謝清齋分菜把待君寒雨話山莊

卜居青郊

人事日相尋一病轉得脫非以求自暇聊用安吾拙遊
雲眷巖巒飛鳥喜林樾浮塵翳何深顧盼滿城闕養生
固有主所貴心理悅西棲情稍乖南尋意已竭清秋命
山輿少覺茲境別郊原信遐曠平野復幽澈經過況通

塗故人便車轍於此慙吾踪何求更殊絕

柴桑抱羸疾杖策歸田園得酒便取醉賦詩常累篇所
居何必遠境由情以偏青郊異南村素心難爲言野老
日數輩談笑亦酣然山翠雖不垂清溪流屋前橋林數
畝秀嘉樹一庭妍有時自種秫豈曰非昔賢

丁未五月趙芷蓀侍御罷職還里見過山莊有贈

烏台三夏有嚴霜忽睹秋鷹下九閭虎豹當關俱寂寞
江河日下正悲涼掛冠已分趨神武請劍還期出尚方
獨使羣流頌忠直孤臣回首總神傷

悲白鷺行

有序

白鷺純潔可愛春夏之交多集水田肉不充俎無取
之者近歲歐洲以爲婦人冠飾重金購求羅網橫加
無復遺種詩以悲之

三月四月水田綠有鳥班班遠棲宿長身玉立意慷慨
好奇頗就盤渦浴鷓鴣鷓鷯不自媚挾子翩翹悄相逐
世外脩然百不憂菰米辛勤旦夕謀松杉窟宅年年在
翻笑奇毛恣遠遊歐洲女兒潔白皙金縷垂肩好妝飾
花冠廣簷玉雪飛駝毛片片無顏色海波極天不可近

洞庭秋清橫羽翼兼金吉光不論價但道一羽錢千百
參差萬舞復何有值翻公庭轉愁絕胡商射彈南山南
里兒張羅北山北已殺千頭縛百頭朝朝暮暮無停息
巖荒林僻盡搜取一殼難容箐深匿向來漠漠飛南風
祇今絕迹澗西東可憐微禽性命盡一笑取醉頗黎紅
吁嗟乎世間亦有高飛鴻胡不雲中來去天無窮

次韻盛潤珊登樓感賦

寒園雙桂十年前門巷消沈各惘然臥病苦求三島藥
倦遊閒帶五湖煙淵明種柳辭彭澤摩詰尋山到輞川

心緒不殊風景別小樓孤月夜涼天

和潤珊生辰感賦

蹤跡誰如魯兩生哀時無復庾蘭成佳辰命酒開懷久
小院看花照眼明莫遣牢愁消意氣且將優暇擬承平
流塵甚欲催華髮絲竹中年耳一傾

吹笛感趙侍御罷官事

擗笛宮牆尚有人宮商猶覺羽衣新清歌未破家山月
胡騎空隨塞上塵曾見寂寥仙侶去不辭蕭散牧童親
故園煙樹今如此卻憶斜陽禁柳春

棄婦爲時相作

棄婦倉皇夜去家繡簾迴望隔霜華片辭棄絕知何爲
中道乖離祇自嗟紈扇輕拋依篋笥兔絲孤寄失蓬麻
臨分儘有靡蕪淚莫倚恩深怨碧車

謝譚組奩編修贈桂

炎壑連蜷生桂樹蒼皮紫肉玉不殊信有姮娥竊靈藥
似是越女搜明珠七年求艾久未得三日留香令所無
更襲芬芳勞杵臼偶親騷賦愧瓊琚

鞦韆

曾聞奏伎出唐宮
峩髻蹁躑妙舞同
近日飛騰看外域
一時歌笑起兒童
沈沈鈴索渾無語
窄窄衣裾穩著風
我欲摩蒼無羽翼
暫勞青眼一凌空

雨

仲夏雨急聲如奔
薄暮重漬陰雲屯
長風過樹鳥忽去
積水平禾魚欲吞
閉門罷酒一燈爇
披衣對客雙眼昏
鄰翁莫漫苦淫潦
隄岸明朝出漲痕

昔遊篇酬潤珊

昔我遊帝京
高志蹙雲漢
扶搖不得上
兩戢秋鵬翰
懷

蘅晦湘埂寒蕪滯江岸退無挈瓶智進有投珠歎尋山
徐市艱泛海張騫倦珍藥詎常覩靈仙祇虛誕善病淹
歲月宴息明夷贊歸休散元髮蓬廬送昏旦藏胸富川
陸臥游恣汗漫何用取王侯長歌白石爛

池荷開一花

初離濁俗應無偶不到瑤池已覺稀一過蜻蜓剛獨立
頻來蝴蝶莫雙飛驚人祇自疑高髻顧影誰當伴羽衣
欲向林塘索同調參差徒爾鬪芳菲

素心蘭

言文言才 卷二
良友茅齋未可期
清秋錦席爲誰移
玉容似此深閨少
孤抱惟應夜月知
鄭夢闌珊曾不妒
屈騷憔悴祇能悲
幽芳一寸憑君寫
泉石琴樽風雨時

雨後看月

庭樹森沈夏雨過
俄看天際湧金波
水邊鸞鏡寒無礙
霧裏蛇珠濕已多
乍入花叢添玉露
漸開煙靄見銀河
宵深軒檻清如許
那有塵氛點薜蘿

贈陳南楨茂才步潤珊原韻

羣屐才賢參簿倫
未遑京洛困緇塵
階前舞鶴垂孤羽

洞底潛蚪媚一鱗射策年華同庾信千時文字笑張寶
何當風雨騰南極濯足天門析木津

歐陽伯元觀察步趙侍御都門留別詩韻二首見贈依

韻奉答

弱柳殘陽唱一蟬迴腸堪斷晚風前哀時奏草情何極
錄別詩篇意黯然塵土雞蟲爭睥睨江山猿鶴共周旋
衣冠且喜枌榆美韋曲招邀不乏賢

鬢絲零落不勝簪抱甕寒泉學漢陰秋徑未除村酒熟
湘江無恙白雲深辭官彭澤少塵事招隱淮南有俗心

想得山堂賢御史芙蓉裁翦稱衣襟

趙侍御開復處分重過山莊

喜謝糾紛心事晚忽聞寬大詔書新
荒村飛動迎詞客
禁闈聰明慰逐臣
問疾遠勞驄馬過
憂時敢望聖恩頻
一樽強進愁何有
酒後秋懷雨後塵

重九日王君莘田見過有作

桂殘蘭盡菊花開
雨後霜前日影來
未覺晚風能落帽
且因佳客一銜杯
彌空野色催黃葉
半嶺秋香護綠苔
卻憶誅茅發幽興
去年今日此登臺

和歐陽文重九登樓

從來茱菊易天涯把酒翻思客憶家
湘水波時催落葉故園霜後見秋花
淹留宦迹江湖晚灑落詩情水竹賒
回首維揚好風日平山堂上望棲霞

二學園

少長處城市未暇理農桑常笑田家拙
焉知歲功忙遠歸就郊垆稍事檢秋糧
寒蔬既盈畦熟稼時登場穠蔭雖未施
桔槔常得將雨中愛新綠風下來生香
時復一樽酒持與野老嘗豈伊明勞酬
聊使吾意償躬耕自云

樂誰爲尼父詳

世事二首和潤珊韻

世事浮雲過太空紛紛去燕與來鴻
酒樽消遣微醺候
碁局傷殘急劫中
漁子祇謀收鵝蚌
奴人誰肯釋雞蟲
翻雲覆雨何爲者
聖且無言況化工

世事糾紛秋復春
長愁憐我眼中人
誰言精衛能填海
祇有桃花可避秦
杖策不嫌丹壑遠
奮衣時與白雲親
似聞勞亂嗟時局
徒使蜉蝣託此身

次韻答劉江生五兄

敏

蝨處神州贅此身寒泉自汲且酬賓
分流同是御溝水高足寧無要路津
舉世因緣多涕淚十年離合一飈塵
舊來風迹今何有道上巾車問隱淪

塵容衰鬢不勝情辜負心期白玉京
羈屐蹉跎都老去江湖狼藉有癡名
歸雲滿屋悄無意棲鳥半林寒有聲
對酒山窗君記取朱梅初蕊隔簾旌

村遊

立冬涉初陽雨盡時一晴村外展
幽訪招攜出柴荆草木黃以衰蕭蕭
寒風鳴道旁坐田父見我起相驚
謂言

久臥病胡今履霜行笑語出村嫗入室傾醪罌盤中拾
瓜菽錯雜階几盈仲春始郊居歲功遂已成獨處廢交
覲淡漠酬餘生未識郊行樂何由沐高情自今得候問
良暇相逢迎

貧婦行

十五爲人婦朝夕不得食去年苦大水居民半漂溺隨
流泛蒸瀟託命蛟鼉宅遵陸喜城闈誰復問鄉域荒園
絕行踪蓬茅足臥息屢日艱一飽轉側無人色賢哉西
家嫗薯漿惠餘瀝病兒新出腹空啼乳無液禪短衣衫

單嚴冬朔風迫母命不違保兒命安可測人生一須臾
念此心懷惻

楊俶純大令以四十賤辰賦詩見贈次韻奉答

少日交親入盛年相看蓬鬢各蕭然縱橫不謝臧三耳
蹭蹬同違尺五天犬馬風塵旋已老夔虺心迹若爲憐
平生弧矢今何屬自拾枯枝藥鼎煙

疊前韻答潤珊

莊叟支離自養年忘機與子共陶然桑田幾日猶成海
媧石何人竟補天偃蹇獨爲君輩起昂藏時受女兒憐

鬚眉疏謝心情老往事風迴一縷煙

和潤珊再疊前韻見贈二首

病骨飄零四五年倦遊回首意茫然
林泉爲我消餘日湖海如君識性天
似此相依堪自放更須何處覓人憐
登樓近日多新句極目蕉溪半嶺煙

樽前流水逐華年自笑顏唐一蹶然
白髮易生多病日黃花新發早涼天
久拚壯歲春如夢未覺人間秋可憐
儘有故園閒歲月且看喬木好風煙

五疊前韻答謝歐陽丈

竹西歌吹自年年歸臥江樓意灑然舟楫鹽梅甘作吏
山龍黼黻記朝天牙琴每屬巴絃和老驥常生病馬憐
欲借延齡一樽酒與公閒話雨湖煙

六疊前韻和答王君穀平

章臺楊柳似當年姑射梅花正窈然少壯不回看逝水
夢魂零亂入青天菊過重九黃無賴樹到斜陽紅可憐
殘病枯禪兩幽寂勞君詩筆掃湘煙

陳南楨茂才以四十賤辰即席賦詩次韻奉答

良朋眞與弟兄親幽寂郊扉笑語新本借園林供好客

偶因衰病學詩人高軒且喜過從密佳句猶勞贈答頻
今日早梅逢酒醜主酬賓勸暖如春

樟木壩

川原松風迴平田望彌迴漁罟接疏塍暮羃列方町上
隨層岑高下與河流永灌溉當奚資靈澤繇修境長源
自靡竭淺注瀉孤冷凝凝上魚沫澹澹落鷗影厯碌草
亭車牛肩日中騁滋養造化功不汲道旁綆澄泓自何
時良苗活千頃無緣假蓄泄旱暵殊不省石橋平可渡
湖水送蒼暝惜無垂綸客相將入雙艇

石亭寺

古驛煙霧黃村豕臥門限素礫屋底垂壞瓦簷下偃臺
梁低可觸道士危不剗殿宇宿漬橫帳席流塵滿草刺
著行衣薪煙掛遊眼聞有修持士梵靜彌旦晚農田苦
災虐未可人力挽報賽豈無由將以息滂旱從古設神
道物窮知所返今世豈不然母因咎荒誕西俗徧禮拜
荒野託羣款我來坐頽廊問訊涕欲漉大地一微塵視
茲諸佛袒

馬王堆

湖外偏安地從來一馬王上流終割據坏土聽興亡柱
遺風雲老園隨草木荒猶疑墓門棘蕭瑟送斜陽
郊原尋古碣村老有遺聞土溜侵幽蘚渦深點暮雲飛
鳶頻跼水孤雁乍離羣秋草年年沒空思七二墳

大橋謁包孝肅祠

人事轉茫昧神祠祀有功遺靈猶白日荒野見清風美
諡門題蝕殘香殿幄通大橋霜霰裏扶病走村翁

戊申二月寒雨

多病逢春正不歡東風吹雨作春寒當階蕙草碧條潤

墮地梅花細萼殘，椒煖已拚傾酒慣。
狐輕彌覺解裘難，郊扉盡日無賓客。
坐看莓苔上藥欄。

百花生日壽歐陽丈

一夜春風是處過，湘皋吹綠漲晴波。
沈思往事桃花笑。

喜作新居

時新築
趣園

燕子歌滄海，渾閒蓬矢在韶光。
依舊

錦屏多看君善識，東皇意大地芬芳。
茁太和

次韻和答歐陽丈見懷兼憶趙侍御山中

遠性忘年分層軒，接夢思懷人題雋句。
上壽憶花時空谷，非徒爾浮雲任所之。
幽居悵深隔知與碧山期。

春陰

漠漠春陰翦不開，薄寒肌粟困人來。
朱英半落雨爲祟，碧實初胎風作媒。
燕語鳩嗁殊未了，蝶迴蜂逐不須猜。
一春物色無多好看，取蒼雲掩綠苔。

小院迴廊坐起遲，春如殘病力難支。
天桃辭暖不成醉，弱柳中寒如欲癡。
自是浮雲知進退，休將皓月比盈虧。
朝來處處芳菲減，苦憶前宵爛漫時。

紫禁

紫禁朱櫻節已過，金盤玉筯事如何。
已憎鐘簾秦宮少。

猶恨書囊漢殿多門下省中看仗馬景陽樓上望銅駝
天邊自有流霞醖不遣人間醉碧蘿

南塘曲

莎湖細雨南塘暖白鳥孤飛蒲葉軟南塘茅屋紫花藤
里兒弱竹挑絲繩甕罌取酒東門郭五里歸雲黯村落
菱刺蓮房澹沱紅盤斟碎露餐玲瓏褰衣蹙踏沙如玉
不勞雕艇搖波綠君不見畫簾瓜李甘冰漿佳人空著
芙蓉裳

夜出城誦古詩感作

夷跣同青史彭殤共北邙未堪隨造化何用苦神傷露
下三更白雲橫萬里蒼乾坤久寥泚揮涕向何方

次韻和潤珊寄意

芳醪聊共惜餘春院草庭花醉裏新心有一絲迴白日
身如萬點趁微塵不憑鳳穴求丹羽定向龍津奮赤鱗
莫笑飛騰渺無益卻從林壑見吾真

劉江生別至滬贈詩見懷答寄濟南

四十青袍乍少錢低眉愁賦遠遊篇三年作客尋詩屐
萬里懷人載夢船江接黃灘春過雨海連青島夜橫煙

故人相見知惆悵話我郊居日醉眠

時羅訓循
提學濟南

次韻和左君翰青枉過見贈

相望相思空逝波山居長日喜相過
明時不睹唐貞觀
盛會難逢晉永和
半世清才悲短鬢
滿懷閒事聽漁歌
荒江老屋蹉跎好
莫更長鳴惜太阿

次韻和翰青贈潤珊

回首孤雲被遠岑
故園重叠故人心
塵飛不到碧山暮
雲去無蹤芳草深
佳句重於雙白壁
健軀強似萬黃金
閒眠淺醉各天趣
未暇相如賦上林

登臺次韻和翰青

雨後平疇一鑑開，明農述酒此登臺。
林花乍落雙蝶守，白雲欲飛孤鳥陪。
劉郎去後桃仍在，陶令歸來柳未栽。
懷抱中年多寂寞，喜君清放自銜杯。

胡君篁舟疊賤辰唱和詩韻見贈和答

玉臺謫降果何年，禪入詩心句皎然。
十里塵霾隨大地，兩家蘿薜近諸天。
垂楊已綠溪雲喜，杜宇自嗁山月憐。
樟港莎橋同釣詠，不須泛宅五湖煙。

篁舟居近青郊

答寄歐陽伯元丈

慘澹看人意自傷
閉關初服對瀟湘
杜陵韋曲同三象
臣朔侏儒共一囊
頗有閒情栽碧柳
更無餘興賦長楊
樓前一水通京洛
早晚鴻書下建章

喜廖蓀咳丈見過

席門車轍偶相呼
健話教予病骨蘇
湖外風騷餘老宿
田間巾服見文儒
脂膏不潤名何損
鐘鼓無情計轉迂
晴日荒郊成獨坐
起看飛鳥下平蕪

次韻和廖蓀咳丈

白袷黃衫侈勝流
酒顏詩吻健滄洲
誰從梵界聞清磬

苦向漁灘覓釣舟，賢智嚮人無淺語。
被襖隨意莫深愁，蔬糝佐茗供蕭索。
習習涼風意未秋。

送楊俶純之官濟南

病中驪唱不堪聞，自理商絃強送君。
奔驥豈宜終伏櫪，驚鴻何惜偶離羣。
題襟莫縱平原酒，杖策須尋日觀雲。
況復風流勝儒俠，一時賓客有田文。

九日登天心閣次韻和潤珊

過盡清秋少快遊，披襟纔得坐高樓。
江山如此自佳節，文酒何當與勝流。
戶牖三重跨城郭，桑麻一帶接松楸。

黃花未放那堪醉斜日隨人過嶺頭

弔白燕

戊申秋三弟彝自海上攜四白燕歸以其二贈楊重
子自飼其二一爲貓所噬一驚死詩以弔之

玉蘭樹下影參差纔過秋簾送客時瓊海倦遊方遠到
畫樓清別正相思驚風墮地身如葉涼雨吹檐夢一絲
依舊雕籠塵不掃唐宮鸚鵡覺來遲

五橘並蒂歌

光緒戊申秋家母壽六十親朋集讌於青郊別墅予

兄弟皆侍適園中有五橘並蒂之瑞詩以紀之

吾聞真境隱四叟長鬚對坐傾旨酒又聞豪語誇千奴
鬱鬱堂下爭奔趨南維丹橘古所重曾出蘭荃著騷頌
青郊有橘二百株條幹鋪紛卅年種清秋日烈菊花黃
釀之作酒娛高堂塤簾吹雲振羅幕雜奏不假金絲鏘
叔子凌騰歸海表二季英森仲堅矯惟餘伯也病婆娑
高下嶷如列指爪庭前擷橘紛朱殷纍纍五實堆玉盤
圓勻豐整互貫串捧四承一仙掌攢親朋趣觀各眉舞
並蒂不奇奇者五陶家柳樹豈關情寶氏桂枝容可語

博物者儒歎稀有波瓊深藏不忍剖
畸情特貌筆不傳
化工有神春在手
人事災祥足感天
荻枯萼秀非偶然
願持寸心挹甘露
長養靈根彌歲年

爲辟園兄弟題五橘並蒂圖

王闔運

嘉樹從來有頌詞
楚風遙補白華詩
同心好詠蘭雙蒂
共氣還如桂五枝
沈約吟成留翠葉
陸郎歸後捧金卮
若能相伴園中隱
應勝商山四皓芝

梁辟園兄弟五橘並蒂圖

曾廣鈞

築屋本因交讓樹
讀騷能頌伯夷心
仙源集慶吞朱

果臣里瑤光散綠陰坐隱肯輸龍綺鞞鳴珂應妬鶴
頭簪漢年西狹圖連理未抵東垣聚五壬

南山文梓鈎陳衛東海珊瑚瑞應圖於古一夔聯四
岳在山二別帶三壺寶家兄弟珠相映徐氏夫妻玉
不如雲起龍驤五天下菁莪殊號比夷吾

贈妹婿王實平廣文

之子善遭謗而我識其真束髮遊里廛恥與獯俗親寧
持白壁操豈厭環堵貧從容就橫舍纓弁翹莘莘十載
久不第含悽常苦辛懷抱既曩矧文章有湮淪鰥魚夜

不瞑鸞鏡生秋塵感此慘無歡跌宕隨車輪未爲公府
吏頗充諸侯賓飛鴻一失勢江漢空垂綸蹉跎返蓬廬
濯足湘水濱青蠅易流點蘭艾豈爲鄰堅白苟自貞何
懼傷緇磷果然被恩私被濯一朝新元公朝委裘召求
草莽臣誰能貢明堂使爾尺蠖伸畜德以相勗勉黽茲
一身願守史魚直不違顏子仁

次韻和答曹籽谷廣文

縱橫金薤字千行恨不持將貢玉堂豪氣元龍應百尺
史才司馬更三長欲收碧海珊瑚秀盡取南山竹箭良

今日河汾須講授漫容身世付歸藏

芳郊野屋喜春晴細柳新桃各有情遊騎遲過知地僻
村醪半醉爲詩清西莊給事能留客子建黃初早擅名
肯向蘅皋唱風絮更開蘿徑掃煙荆

送黃澤生鎮軍趙芷蓀提學入川兼呈次山制府

西輶雙駕並才雄物色惟憂楚藪空將略論殊今葛亮
儒流心折一文翁旌麾合沓荆門雨劍佩縱橫巫峽風
霧裏少微甘寂寞計安危局有嚴公

廖笏堂觀察吳子昂陳子美兩孝廉黃宇澄廣文招飲

蔭園爲癸卯同舟會並餞楊君華生李君侗君歐洲
之行子以病不克往賦詩見意

憶昔泛滄海春流一碧鋪開航爭曉色騁步向高衢各
有鷗鵬志聊爲雁鶩趨從知旅行樂真與俗中殊

艱苦誰相念憂勞祇自精六年纔一瞬萬里此孤行浩
蕩隨風雨浮沈共友生詩書仍座上吾道亦縱橫

短鬢慚衰退青雲羨遠遊獨居長採藥東望日登樓未
暇牛山戚寧同漆室憂殊年較肥瘠姿趣一悠悠

上野頻攜手長沙更舉觴飛騰看展翮歡笑各迴腸乍

會還相別分攜敢便忘風飈佇星漢豈爲惜河梁

殘病

殘病經春苦索居七年憔悴轉如初求醫每下平生意
致藥常馳萬里書憎飯豈嫌蔬淡薄看花惟見葉扶疏
支頤箕踞資吾靜翻笑塵勞卻不如

春夜

沈沈春院中深望隔籬空雨過難爲霧雲來若有風誰
將杜鵑血化作海棠紅見說春宵貴閒愁爾許同

桃花行

晴雲吹破臙脂色幽尋夜到漁郎宅墮地芳塵寂不飛
春歸春住無消息太液池頭樹樹紅騎嘶白馬踏東風
空持片藥誇漁父誰信仙源在洞中有客乘風上三島
徧地珠纓顏色好移根上苑新作花鶯聲百變催春曉
紺井緋簾盡改顏不須重作武陵看巖邊一樹爭秋實
且待漁竿日暮還

上已讌遊作

層岡氣澄鮮雨霽片雲碧況茲袂楔辰怡顏百昌息幽
興眷朋舊招尋展良覲志意謝軒冕文彩耀圭璧清言

理不間妙賞情逾適
烏練紛中堂
罽醕凝素席
藥秀含珠英
梅肥養玉液
淑景方在茲
駸駸日俄夕
同行素心侶
執袂引芳跡
遵路憩幽茨
歡言若疇昔
披胸一物我得象
忘喧寂
撫今信綢繆
覽古彌昭晰
緬想永和年
母爲山川感

答廖笏堂

十年書劍客
示我有新詩
講學文中子
談兵杜牧之
不期收美譽
已是負清時
驥足誰能絆
春郊試一馳
酬易大兄宗夔

與子時相別清癯不似前平生好奇服青眼接時賢太
息凌雲翼沈吟求友篇猶聞起中夜不愧著先鞭

少日篇

少壯三春姿皎皎若桃李朱顏照白日歌鐘送清醴娛
樂及須臾繁華會消弭皓魄旋復虧芳蘭有時靡以此
感中情覽化測元理光缺望復盈葉瘁春還綺時序方
代遷百物貞元起吾生豈能外惻惻意未已貞疾恆不
死勿藥益有喜義宣著明訓達者茶如薺

贈寧鄉張君毓衡

張君善醫年五十四始納妾舉丈夫子作詩見示因

贈此歌

張侯五十不育子我亦四十無男兒迂儒抱經頗戚戚
孤虛偶值安足奇世人懷藏重付託愚公有志南山移
豈惟滄澗待薦奉又豈金帛貪留貽西家問安日數輩
無乃惇獨心不夷張侯念此內自壯起視三五明星隨
幽蘭入夢香在握照耀弧矢歡門楣自此經天耿圓魄
懸空不類流星馳似聞張侯善靈素上藥豈假餐瓊芝
胡爲枯楊索初震彌月竟誦生民詩憶我槃阿久獨寐

疾痛嘗就張侯醫張侯自康人未泰或有妙理難宣披
無功有愧哂自昔今我引愧良解頤充閭知已命名字
拜索玉果陳此辭

志士行

含酸若旨蓄履險如坦途所志康世屯豈愛輕賤軀玉
玦不示人常恐嗤爲愚旦暮求其儕行行步城隅城隅
復伊誰大俠侯與朱相思不得見但見西飛烏飛烏爾
莫嘸欲語心踟躕

五月五日步廊下

至心自遐觀豈爲物形遷終歲病拘蹇佳節景忽妍柔
條美且豐野花繁以鮮浮階夏雨潤當窗晚晴暄大氣
有迴薄生理與轉旋良襟得所欣安在非坦然偃卧或
云劬閒步且復便大化相與適外情何由牽

題外王考訓導劉公遺像

公諱華鏞字岳生同縣廩貢生官永順縣學訓導

蠻天風雨颯鬚眉謀國高文世莫知卻記兒時上翁膝
酒邊教誦中興碑

青郊詩存卷之二

女士梁若愚校字